

Hartbeeshoek - 8-10 November

Nog 'n besondere Rietvallei-jaar het aan die einde gekom en dit is deurgebring by die gewilde Hartbeeshoek Wildreservaat. Die seniors het vooraf, vanaf Maandag reeds, aangekom en weereens heerlik saamgekamp. Na 'n kwaai storm Donderdagaand wat vir enkele woonwaens skade gebring het, was die weer heerlik warm.

Vrydagmiddag het die res van die woonwaens begin aankom en is daar oor-en-weer gekuier, gebraai en is die naweek afgeskop met die gebruiklike boekevat waargeneem deur Neels de Klerk. Saterdagoggend het die dapperes die stofpad gevat om weer die litte los te maak. Soos ek die groepie beskou het was dit die nie-werkendes wat gaan stap het. Die werkendes het die kans waargeneem om so bietjie laat te slaap. Die hitte het 'n mens egter gou uit die bed gejaag. Die dag is verwyl met kuier, swem en van die jongeres het dit ook gewaag om bietjie perd te ry terwyl ander begin het met die voorbereidings van die safari-ete Saterdagaand. Sommer gou het almal met hul mandjies en stoele by die voorgeregpunt saamgekom en Fanie en Alida Venter het die tafelgebed gedoen. Almal het hulself net begin help aan die sop en beskuitjies toe die sandstorm ons oorval. Moedig is vasgehou en toegehou en geskuil van die stof en reën, sambrele is gou uitgepluk en net so skielik het alles weer bedaar en kon daar verder gesmul word.



Die hoofgereg – potjiekos, rys en slaai – is voorgesit langs die dam waar Marietjie hul woonwa opgetooi het met kersfeestooisels en nadat die ete bedien en geniet is, is die boekeval waargeneem deur Albert Gazendam en het Tjaart al die nodige formaliteit afgehandel naamlik gaste verwelkom, nuwe lede bekendgestel en toekennings oorhandig. Die groep het daarna na die saal verskuif waar dit ook opgetooi was met kersversierings en ‘Ons Orkes’ het ons verwelkom met hulle voetejeuk-musiek. Die nageregtafel was ‘n fees van versoeking en al die soete verleiding was die kersie op die koek na al die heerlike etes. Daar is weliswaar ook ‘getwo-step’ en gewals op ou bekende musiek en jonk en nie-so-jonk het in die kring ingeval met die ‘Chicken Dance’ onder die bekwame leiding van Sonja en Elize. Sommige was maar bietjie deurmekaar met al die bewegings maar die geesdrif was aansteeklik.

Sondagoggend het almal vergader in die saal waar Tinus met sy kitaar voorgegaan het met Kerssang. Hans het gesorg vir ‘n CD met ‘n boodskap wat tot elkeen gespreek het, en dit het alles bygedra om ons stil te maak in dankbaarheid vir die groot genade van ons Hemelse Vader, vir sy seën oor ons Rietvallei streek.

Willem en Sonja de Jongh was die trotse ontvangers van die Stomp van die Jaar. Saam met hulle is Tjaart en Marietjie

Klaasen. Regs is Tinus en Tersia wat die vrugtekoek gewen het met hul gelukkige lootjie.





Links bo na regs onder: Tjaart oorhandig die volgende saamtrektoekennings aan Willem en Sonja de Jongh (50 algemeen), Hans en Erna Koekemoer (125 algemeen), Henk en Glen Kahts (50 algemeen), Sieg en Annatjie Maritz (140 streek) en Albert en Inge Gazendam (40 streek).



Hans verwelkom die 4 gesinne wat as gaste die naweek saam met ons geniet het.



Mel oorhandig die kampkommandanteplaatjies
aan die bestuur.





Jean-Pierre Viljoen en Jomi Kruger



